



**Siverth K. Heilmann**

**04. 10. 2019**

**Atassut**

**UKA 2019/23-1**

**Uunga siunnersuut: Piniarneq aallaaniarnerlu pillugit Inatsisartut inatsisaat nr. xx, xx. xxx 2019-imeersoq**

(Aalisarnermut, Piniarnermut Nunalerinermullu Naalakkersuisoq)

Naalakkersuisut Piniarneq aallaaniarnerlu pillugit Inatsisartut inatsisaata naleqqussarnissaanut saqqummiussamut Atassut-miit imatut oqaaseqarfigissavarput.

Qularutissaanngilluinnartumik Nunatsinni piniartuunermiit aalisartuunermut ikaarsaarsimanerput ukiuni makkunani allanngornikooqisoq pillugu, piniartut sunngiffimmilu aallaaniartartut akornanni kiisami inatsisartuni allannguiniarnerat piffissanngorneranik isumaqataasut.

Uagut Atassut-miit aamma taamatut isumaqarpugut, tassami pinngortitaq allanngorartuartoq aqussinnaanngilluinnarparput, peqassuseq imaani nunamilu allanngorartuarmat, piniakkat tammakartarmata takkusimaartarlutillu, uumasooqatigiillu imminnut nerisareqatigiittarnerisigut peqassutsimut innarliisarmat, piniartooq piniarluttartuusulluunniik kisimik pisuutinneqarsinnaanatik.

Inatsisartut inatsisaata siunertaata § 2-imi immikkoortunut 3-inik aggulunneqartut kiisalu § 3-imi immikkoortunut 13-inut assigiinngitsorpassuarnik nalunaarsorneqarsimasut pillugit Atassut-miit tamaviisa oqaaseqarfiginiannilagut isumaqarlutali, ataatsimiititaliami suleriaqqinnissatsinni eqikkaanerussaaneq siunertaralugu oqallisigilluarneqartariaqartut.

§ 4-imi Naalakkersuisut inatsimmik malitsitsinissamik nakkutiginnikkumanerisa saniatigut, tamakkiisumik ilaannakortumilluunniit kommunalbestyrelsinut tunniussisinnaanerata ammaffigaat, piniakkalli killilersukkat pisassiiffiusuni assigiinngitsuni pineqartillugit, piniqaatigiit allaneersut ataatsimuulersoorsinnaasarnarput pisanillu agguqaatigiissinnaasarnarput. Nalunaartussaataaneq kiap kikkulluunniit piniakkap pisarineranut, eqqortumik nalunaartussaataanermut akunnattuungatitsisarnera, matumani ilisimatitsissutigissavara. Innersuussutigissavara § 6 imm. 1 inuit akuersissutaateqartut taamaallaat ingerlanneqarsinnaasoq oqariartuutigineqarmat.

Inuussutissarsiutigalugu piniarnissamut aallaaniarnissamullu akuersissut ilaatigut, § 7-imi Kalaallit Nunaanni aalajangersimasumik najugaqareersimanissamik piumasaaqatit, atuisut nunaqavissullu amerliartuinnarfiini, avataaniik tikittartut nunatsinneereersimanissamik piumasaaqataasoq, ukiuni tallimanut (5) sivitsorneqarnissaa Atassut-miit allanngortinneqassasoq nalilersoqqarput.

Aap partiini tamatta, piniakkat, aalisagaappataluunniit, nungusaataanngitsumik qulakkeernissaat inatsisiliornermi pingaarteqaarput. Ukiut ilaanni, tuttunniartitsinermi umimmanniartitsineruilu killilersuinerujussuaq eqqunneqarmat, kiap puigunngilai, angallateqanngitsut aallaaseqanngitsut pisassinneqarnissamut qinnuteqarsinnaalersitsineq, kommuuneni makitsinerpassuit piffissaajaatit



ingerlassimavagut. Piffissap ilaani peqarpallaaleqaarooq takanna piniarniarsigimik biolog-it inassuteqarnerat malinneqaraangata, imminut assortuuttumik piniartut atuisullu ilisimasaat tusaaneqaratik – illuinnaasiortutut sulinertut Atassut-miit nalilertagarput paasineqarniarli.

Takornarissanut piniartitsisarnerit ima ingasatsikkaluttuinnartigipput, nunap timaannarsuani tuttnik panertuliniartartut piniartarfitoqarsuini inngiarneqaleraluttuinnarneri akuerineqarsinnaangitsumik piviusuupput. Aap kommuune susassaartoq akuersisartuuvoq, imaassanngilluinnarporli, takornarissanut piniartitsinissani akuerineqartut, piniartutoqarsuit piniarfiini takornarissat inngiaasuussasut aammalu pisaq tamakkernagu qimaannakkat takussaaleralluttuinnartut. Unioqutitsinerit akuersissutaateqartunut kinguneqartassasoq tappiffigineqartariaqartut Atassut-miit isumaqarpugut.

Pissusissamisunnngitsut iluarsineqarnissaannik Naalackersuisut anguniagaqarnerat Atassut-miit isumaqatigeqaarput. Naallu inatsisissatut siunnersuut tamakkerlugu oqaaseqarfiginngikkaluarlugu pisarnitsitut isummersoqqinnissamut suleqataassaagut.

Taamatut oqaaseqarluta suliap aappassaaneernejartigani, ataatsimiititaliami susassaqartumi peqqissaarullugu suliarineqarnissaa inassutigaarput.

Qujanaq.